

中國方志叢書·華北地方·第四十七號


據清·光緒三十三年鉛印本  
清·黃篤瓚撰  
影印

山東省

# 平陰縣鄉土志

(全)

成文出版社印行



\*10107734\*

中華民國五十七年三月壹一版

# 平陰縣鄉土志

定價：新台幣一二〇元正

發行人：黃 成 助

臺北郵政信箱二二六〇五號

出版者：成 文 出 版 社

臺北郵政信箱二二六〇一〇號  
電話：九二二〇一〇號

印刷者：正 大 印 製 廠

三重市長生街二號之一

內政部登記證內政臺業字第一一四七號

版權所有

光緒丁未篤瓚攝令平陰承學使者檄修鄉土志爰延邑人朱優  
貢名焯任蒐輯而綴書其端曰鄉土志之作蓋欲周知民隱紀綱  
憲政即周官土訓形方之遺意也泰安七屬平最褊小絕長補短  
裁五十里耳地境夾河南北南多山石童岡起伏居民雜墾其中  
所居之室率壘石爲之北多沙灘河隄卑薄倚民埕爲固每歲伏  
秋集民夫防護爲汎地者約四十里而弱縣治當南岸距河三四  
里自河身日高瀕河之民爲閘以禦水七八月之間雨集山水內  
注者不得出河水外溢者復慮其入常惴惴然以故埒城西北之  
地每不得耕種近十數年來海禁大開山東州縣風氣皆大異曩  
昔獨平邑瘠苦無殷商遠賈士民樸愿鮮鬻陵之習然其敝也見

小而畏蕙里中一二桀黠之徒得因事苛斂以自便其私令斯土者又皆以速代爲幸蓋亦不勝其困矣夫周官爲制治之書而六職所載凡民間之至纖至蹟無不備具今世公卿大夫身處堂奧之上矐目抵掌朝建一謀曰某政當興夕發一議曰某法當變傳符之下急如星火紛逾牛毛究其歸宿通都大邑多不免隔閼難行違論荒僻哉大易之言曰何以守位曰人何以聚人曰財謹依所頒條例於政績之後益以職官而略著其祿糈之數於戶口之後益以賦稅而粗志其歲入之經佐治之員鄉里之官能設與否可考而知也則庶乎談憲政者之一助云爾秋八月旣望濟南府同知署縣事黃篤瓚謹叙

平陰縣鄉土志目錄

歷史

政績錄

職官

兵事錄

耆舊錄

人類

戶口

賦稅

氏族

宗教

實業

二  
三  
四

地理

山

水

道路

物產

商務

## 歷史

### 未置本境以前

平陰在唐虞夏爲兗州地殷屬徐州周屬兗州大清河橫貫境內爲古濟瀆今爲黃河禹貢濟河惟兗州爾雅殷制濟東曰徐州周官職方氏兗州其川河濟知平陰於古屬兗徐

自春秋至戰國皆屬齊有平陰之名而非盡今縣地也秦仍舊名分爲東郡地漢改名盧縣屬泰山郡後漢屬兗州濟北郡晉屬兗州濟北國南宋屬兗州濟北郡北魏屬齊州太原郡北齊省盧入肥城隋開皇十四年置榆山縣在今治西南大業初移今治改名平陰

既置本境之後

隋屬濟州濟北郡唐屬河南道鄆州東平郡五代因之宋屬京東西路東平郡金屬山東西路東平府元屬中書省山東東平路明屬山東兗州府東平州

國朝初屬兗州府雍正八年改隸東平直隸州十三年改隸泰安

政績錄

興利

宋

龔鼎臣字輔之郟之須城人爲平陰主簿時濟水溢兩岸胥爲澤國鼎臣白諸令度地鳩工鑿渠洩水晝出沒泥淖夜露宿河干民大感動渠成得良田數百頃次年濟復溢不害田

元

趙時彥冠州人爲平陰縣尹時兵革初定府庫空匱戶口流亡過半時彥下車闢田野勸農桑均賦役片言折獄無不允服居官臨民事無過舉去後民刻石頌之

明

徐州牧江西豐城人萬歷二十六年權平陰令常控驢適野召父老子弟與溫語見勤農獎以粟布惰者斥不少貸地隙宅畔悉令樹桑多者立獎之三年民大化

國朝

劉代聞湖南衡陽人乾隆十四年以舉人宰平陰時比歲不登民多失業代聞招流亡督耕種相土宜種桑柘及諸果實泄官三月即捐廉修榆山書院時至民舍問所苦有訟輒從阡陌間決之教子弟以孝弟聞者莫不感泣

張樸字小波直隸定州舉人道光二十三年宰是邑時河溢北岸

樸履勘之知黃家圈舊有柳木溝金牛窪亦有金牛河攷其故道並濬之三月工竣河北數十里無水患定書院規則與士子昕夕討論又在城建義塾一區去後常見思

去害

宋

范諷字補之以蔭補將作監主簿出知平陰縣會河決王陵水去田失阡陌民訟不決諷分別疆畔著爲券民持去不復爭時詔塞決河募人入芻槌城邑與農戶等諷曰貧富不同而輕重相若農必大困且詔書使度民力今均取之此有司誤也即改符使富人輸三之二因請下諸州以此爲率朝議報可

金

劉索字彥高燕城人有番僧詐名貢獻往來侵漁百姓苦之索燭其奸繩以法百姓大悅索爲政嚴吏胥簡訟獄泣任三載流民復業者數千家

國朝

劉昇祚字念恒山西汾陽人崇禎丁丑進士 國初知平陰縣鼎革之交地方殘破昇祚踏荒清地輕徭賦緩刑罰政治一新部署甫定而巨寇周魁軒李西吾等糾匪數千攻城十晝夜不息乃令壯士田玉等夜縋城乞援兵至圍解大吏又命鄰境土寇一任勦撫不兩月皆平以卓異遷兵部主事

陳秉直奉天海州人宰邑四年救敝多方上派戰艦河夫軍需等項累抗不應城垣公署皆割俸興修值河溢出資撫卹災黎詳報大吏蠲免漕租順治十年遷通判去

胡鳴珂湖北天門人乾隆十五年以進士宰是邑時河決牲畜什物漂沒無算鳴珂覓舟數十艘分投各村拔諸難民載餅餽親散災區亟請於大府得急賑數千金全活無算

聽訟

元

董繼昇字鵬飛順德人訟者至假以溫顏必得情而後決莫不稱平小過容恕未嘗笞辱爲政期年幾至無訟

明

史資教山西蒲州人治先教化臨事裁決如流察微洞隱若家至戶觀人吏畏之不敢欺

唐虞讓廣西人崇禎十年宰平陰政尙和平敏於聽訟先至者隨事決遣之以其辭質後至者莫或狡飾故事日簡而民不擾御胥役至嚴騷擾者論如法然籌其生計必均必一故胥役亦無怨者茹時芳河南滎池人繼唐虞讓爲令有兄弟爭田者時芳親勘其田忽自掩泣訟者驚問曰吾兄弟日相依及來平陰吾兄已不及見今見汝兄弟偶思吾兄故悲耳訟者感泣以田互讓乃中分之旋擢河工同知去

國朝

黃承道江西安義人禔躬清介不爲苛峻日坐堂皇每決事必親書判語令兩造各讀一過不識字者使吏朗誦之皆翕服凡訟牒不輕准准必訊訊必結獄情旣得輒予決遣省株累涖平十餘年士民安之

職官

知縣一員額定俸銀二十九兩二錢五分九釐除扣二成并減平外現在均奉文扣解

額定養廉銀一千兩除停給一成核減二成并減平外每年實支銀六百七十六兩八錢署事減半

額定公費銀一百四十四兩除核扣二成并減平外每年實支銀一百零八兩二錢八分八釐

教職二員每年應支俸銀八十兩除扣二成并減平外每年實支銀六十兩一錢六分現裁復諭尙未離任

典史一員每年應支俸銀三十一兩五錢二分除扣二成并減平外每年實支銀二十三兩七錢三釐養廉銀八十兩除扣二成并減平外實支銀六十兩一錢六分署事減半

把總一員每年支領銀六十七兩八錢壹分兵一名  
局委副巡官一員定薪水每月二十四兩無的款隨時籌給

## 兵事錄

順治三年冬劉昇祚爲平陰令東阿賊周魁軒肥城賊李西吾糾衆屯孔村謀攻城有牛寵者告警昇祚簡丁壯備戎器俄賊至圍城三周昇祚命王朝屏傅三捷等分門守禦遣田玉赴省求救賊攻益急朝屏率壯士力戰却之三日大兵集賊驚散李西吾返陶山朝屏設伏於隘擒之魁軒走死餘黨悉平

咸豐十一年正月捻賊竄東平梁山知縣高潛練鄉團赴安山防堵二月賊偵運河水淺夜北渡擾縣境至孝直孔村潛集團勇數千守城賊大股竄甯陽曲阜泗水諸縣逼城下者數百騎沖突數次發巨礮轟之賊知有備遂引去